

ՀՀ ԿՐԹՈՒԹՅԱՆ, ԳԻՏՈՒԹՅԱՆ, ՄՇԱԿՈՒՅԹԻ ԵՎ ՍՊՈՐՏԻ ՆԱԽԱՐԱՐՈՒԹՅՈՒՆ
ԳՈՐԻՍԻ ՊԵՏԱԿԱՆ ՀԱՄԱԼՍԱՐԱՆ



ՀԵՐԹԱԿԱՆ ԱՏԵՍԱՎՈՐՄԱՆ ԵՆԹԱԿԱ
ՈՒՍՈՒՑԻՉՆԵՐԻ
ՎԵՐԱՊԱՏՐԱՍՏՄԱՆ ԴԱՍԸՆԹԱՑ

ԱՎԱՐՏԱԿԱՆ ՀԵՏԱԶՈՏԱԿԱՆ ԱՇԽԱՏԱՆՔ

ԹԵՄԱ՝ Ակսել Բակունցի «Ալալիական մանուշակ» պատմվածքի
ուսուցանումը

ԱՌԱՐԿԱ՝ Հայոց լեզու և գրականություն

ՀԵՂԻՆԱԿ՝ Լիանա Լալայան

ՈՒՍՈՒՄՆԱԿԱՆ ՀԱՍՏԱՏՈՒԹՅՈՒՆ՝ Խնածախի միջնակարգ դպրոց

Աշխատանքը թույլատրված է պաշտպանության

ԱՇԽԱՏԱՆՔԻ ԳԻՏ. ՂԵԿԱՎԱՐ՝ Սոնա Ալավերդյան

Գորիս 2022

Բովանդակություն

ՆԵՐԱԾՈՒԹՅՈՒՆ.....	3
1. Ակնարկ՝ Ա. Բակունցի «Ալպիական մանուշակի» մասին.....	4
2. «Ալպիական մանուշակի» ուսուցումը.....	5
3. «Ալպիական մանուշակը» պատմվածքի քննարկականությունը	9
ԵԶՐԱԿԱՅՈՒԹՅՈՒՆՆԵՐ.....	12
Գրականության ցանկ	13

ՆԵՐԱԾՈՒԹՅՈՒՆ

Թեմայի արդիականությունը: Լեզվաբանության և մանկավարժագիտության զարգացման արդի փուլում շատ դրույթների վերանայման պահանջներ են առաջ քաշվում, և հարցադրումների այս համատեքստում անհրաժեշտ է նոր մոտեցում հանդես բերել գրականության ուսուցման մեթոդաբանության նկատմամբ: Աշակերտների աշխարհայացքի ձևավորման, նրանց հոգու և մտքի հարստացման, գեղարվեստական մտածողության զարգացման գործում անգնահատելի է գրականության դերը: Ա. Բակունցի «Ալպիական մանուշակ» պատմվածքի նորովի ուսուցման կարևորությունը ընդգծում ենք այն առումով, որ սովորողները հաճախ նշանակություն չեն տալիս խոսքի պատկերավորությանը, ստեղծագործության գեղարվեստական արժանիքներին, նկարագրություններին, լեզվին և ոճական առանձնահատկություններին:

Հետազոտության նպատակն է միջին դպրոցում ուսուցման ակտիվ և փոխներգործող մեթոդների, հաղորդակցական ու տեղեկատվական միջոցների և ինքնատիպ մի շարք աշխատանքների կազմակերպման միջոցով ցույց տալ՝

- նյութի դասավանդման ժամանակ ուսուցչի մեթոդամանկավարժական մոտեցումները,
- միջին դպրոցի սովորողների մտածողության, երևակայության, ստեղծագործական կարողությունների զարգացումը,
- սովորողների մեջ զգայական-գեղագիտական ընկալումը,
- սովորողների կապակցված խոսքի, բառապաշարի հարստացման, տրամաբանական և ստեղծագործական մտածողության ձևավորման ուղիներն ու միջոցները:

Առաջադիր նպատակով պայմանավորված հետազոտության **խնդիրն է** մանկավարժական գիտափորձի միջոցով պարզել, թե ինչպիսին են՝

ա) սովորողների ստեղծագործության զգայական գեղագիտական ընկալումը,

- բ) բանավոր խոսքի զարգացման մակարդակը,
- գ) վերլուծելու, համադրելու, եզրահանգումներ անելու կարողությունները
- դ) մշակել արդյունավետ ուսուցման պայմաններ, որոնք կնպաստեն գիտելիքների խորապես յուրացմանը,
- ե) այնպես կազմակերպել գործունեությունը, որ այն առաջացնի ընդհանուր անհանգստություն, ապրումներ, նպաստի սոցիալական հմտությունների ձևավորմանը:

Հետազոտության օբյեկտը Ա. Բակունցի «Ալպիական մանուշակ» պատմվածքի ուսուցման գործընթացն է միջին դպրոցում:

Հետազոտության առարկան ուսուցման գործընթացում սովորողների մոտ զգայական-գեղագիտական ընկալման ձևերի ուսուցանումն է «Ալպիական մանուշակ» պատմվածքի միջոցով:

Հետազոտության մեթոդներն կիրառվել են դիտումը, մանկավարժական գիտափորձը (արձանագրող, հավաստող և ձևավորող տեսակներով), վերլուծությունը, ուղորդված ընթերցանությունը, շարադրանքը, հարց ու պատասխանը:

1. Ակնարկ՝ Ա. Բակունցի «Ալպիական մանուշակի» մասին

«Ալպիական մանուշակը» պատմվածքը, որի մասին գրականագետ Ս. Աղաբաբյանը առաջ է քաշում այն տեսակետը, թե այն «որոշ իմաստով նվիրված է գեղագիտության հիմնական առարկային՝ արվեստի և կյանքի փոխհարաբերությանը»,¹ Բակունցի առաջին գործերից է: Այստեղ արտահայտվել են նրա արձակի էական հատկանիշները՝ ուրույն աշխարհագրացումը, բարոյական ու գեղագիտական ըմբռումների ինքնատիպությունը, նրա արվեստի փիլիսոփայությունը, անմնացորդ սերը հայրենիքի ու մարդու հանդեպ:

¹ Ս. Աղաբաբյան, Ակսել Բակունց, Երևան, 1963, էջ 82:

Ստեղծագործական մեծ վերելքի պահին, անդադար մաքառումների մեջ նրա վրա իջավ բախտի ծանրագույն հարվածը: Ոչինչ չօգնեց, ո՛չ վաստակը, ո՛չ գաղափարական հարստությունը, ո՛չ ինքնախարագանումը: Վերջին դիմումնամակում նա խոսում է իրեն տանջող խոհերի մասին, կյանքի ու խոսքի կարոտի մասին: Այդ օրերին նրան հասկանում և հավատում էին քիչ մարդիկ... Նրան հասկանում էր Եղիշե Չարենցը: Նա պաշտպանում է Բակունցի անմահ արվեստը՝ համեմատելով այն հայ հնագույն հուշարձանների հետ, նրանում տեսնում է իր ժողովրդի ոգու և երազների հավերժական փայլը:

2. «Ալպիական մանուշակի» ուսուցումը

Նախքան ուսուցմանն անցնելը աչքի ենք անցկացնում բնագիրն ու գրականագիտական-քննադատական աղբյուրները, առանձնացնում ենք բոլոր այն նյութերն ու աղբյուրները, որոնք օգտագործվելու են թեմայի ուսուցման ողջ ընթացքում: «Ալպիական մանուշակ» պատվածքի ուսումնասիրությանը տրամադրում ենք երկու դասաժամ: Առաջին դասաժամի սկզբում ներկայացնում ենք թեմայի վերնագիրը, պատմվածքի ստեղծման պատմությունը:

Պատմվածքը գրել է 1925-27 թթ. և նվիրված է Արփենիկ Չարենցի հիշատակին: Գրողի՝ Մեղրու շրջան կատարած ուղևորության հետ է կապված պատմվածքի մտահաղացումը: Այդ ուղևորությունը Բակունցը կատարել է իր բարեկամի՝ երկրաբան Տիգրան Ջրբաշյանի հետ միասին: Նրանք մի երրորդ անձի ուղեկցությամբ այցելել են Մեղրու շրջանի մի շարք վայրեր, այդ թվում՝ ավերակ բերդեր: Պատմվածքում ծովափի հիշատակված կինը Բակունցի ընկերուհին է եղել, նա արևելագետ Ժենյա Գյոզալյանն է, որի համար էլ Բակունցը առաջին անգամ կարդացել է պատմվածքը:

Դասաժամի 20 րոպեն հատկացնում ենք պատմվածքի գեղարվեստական ընթերցանությանը: Այդ ընթացքում սահիկաշարի միջոցով ցուցադրվում է նախապես

պատրաստված նյութը: Հնչում է մեղամաղձոտ երաժշտություն, էկրանի վրա ցուցադրվում են Կաքավաբերդը, լեռներն ու ժայռերը, Բասուտա գետը:

Կարծում ենք, որ գրականության ամեն մի ուսուցիչ իսկապես դժվար վարժանքով պետք է հասնի այն բանին, որ աշակերտները կարողանան ընթերցել արտահայտիչ ու վարժ: Չէ՞ որ դա այնքան ժամանակ, այնքան նվիրվածություն ու նրբություն, «սև» աշխատանք է պահանջում:

Նպատակ ունենք լսել տալու ոչ միայն **ինչը**, այլև **ինչպես** և **ինչու**: Կարծում ենք որ մի շարք երկերի առաջին ընթերցման մենաշնորհը պետք է պատկանի ուսուցչին: Նման գործերը բնավ էլ նախօրոք չպետք է պարտադրել կարդալ: Ուսուցչի առաջին ընթերցանությունը (խոսքը գեղարվեստական ընթերցման մասին է), եթե ոչ ամեն ինչ, ապա շատ բան է որոշում: Ընթերցելիս ոչ մի բացատրություն-մեկնաբանություն չենք տալիս, ամեն ինչ՝ հիացմունք ու հույզ, խորհրդավորություն ու հանդիսավորություն, կարեկցանք ու զայրույթ և այլն, փորձում ենք արտահայտել դիմախառի ու ձայնի երանգ-ելևջներով: Դա աշակերտներին մտորել է տալիս, համակում գեղեցիկ զգացումներով: Այնուհետև սկսում ենք բնագրային աշխատանքներով բացահայտել մի շարք մանրամասներ: Դասարանը բաժանում ենք չորս խմբի, տալիս ենք թերթիկներ՝ նախօրոք գրված հարցերով: Առաջին խումբը պատասխանում է հետևյալ հարցին. «Ինչպե՞ս է գրողը նկարագրում աշխարհը, Կաքավաբերդը, ալպիական գեղեցկությունները»: Երկրորդ խմբին հանձնարարում ենք տալ նկարչի և հնէաբանի համեմատական բնութագիրը (կարելի է կազմել T-աձև աղյուսակ), երրորդ խմբին՝ ներկայացնել հերոսուհու և ծովափի կնոջ նկարագրությունը, խանդի տեսարանը, չորրորդ խմբին՝ խոսել պատմվածքի լեզվառճական առանձնահատկությունների, պատկերավորման միջոցների մասին:

Բնագրային աշխատանքներից էլնելով՝ նկատում ենք, որ նրանք ճիշտ են ըմբռնում մուտք-բնապատկերների իմաստը, հակադրությունները, իրականի ու երևակայականի զուգորդումները, անցյալի ու ներկայի, հնի ու նորի խորհրդանիշերը: Այդ հակադրություն-զուգորդումներն են՝ ավերված բերդն ու կենդանի (մտովի

կենդանացրած) բերդը, բերդի լուրջունն ու գետի աղմուկ-շառաչը: Աշակերտները առանձնացնում են և ներկայացնում հետևյալ հատվածները.

«Կաքավաբերդի գլխին տարին բոլոր ամս է նստում, բերդի ատամնաձև պարիսպները կորչում են սպիտակ ամպերի մեջ, միայն սևին են անում բարձր բուրգերը: Հեռվից ավերակներ չեն երևում և այնպես է թվում, թե բուրգերի գլխին հսկում կա»²:

«Լուրջունն կա Կաքավաբերդի ավերակներում: Միայն ձորի մեջ աղմկում է Բասուտա գետը, քերում է ավերքը և հղկում հունի կապույտ որձաքարը: Իր նեղ հունի մեջ գալարվում է Բասուտա գետը, ասես նրա սպիտակ փրփուրի տակ ոռնում են հազար գամփռներ և կրծում քարե շղթաները»³:

«Պարիսպների գլխին բույն են դրել ցինը և անգղը: Հենց որ բերդի պարիսպների տակ ոտնաձայն է լսվում. նրանք կոնյունով աղմկում են, թռչում են բներից ու ահարկու պտույտներ անում բերդի կատարին: Ապա բարձրանում է քարե արծիվը, կտուցը կեռ թուր, մագիլները՝ սրածայր նիզակներ, փետուրները որպես պողպատե զրահ:

Կաքավաբերդի բարձունքի միակ ծաղիկը ալպիական մանուշակն է, ցողունը կաքավի ոտքի պես կարմիր, ծաղիկը ծիրանի գույն: Քարի մոտ է բուսնում ալպիական մանուշակը, պարիսպների տակ: Արևից քարերը տաքանում են, և երբ ամպերը ծածկում են քար ու պարիսպ, մանուշակը թեքվում է, գլուխը հենում քարին»⁴:

Անդրադառնում են նաև սրանց հաջորդող այլ՝ մարդկային կյանքի պատկերներին՝ քարաժայռերի վրա թառած տներ, հորանջող շինական, ամեն գարնան ծաղկող ալպիական մանուշակ: «Քանի՛ սերունդ...»⁵ արտահայտությունը ժամանակի անհաշվելի տեսականությունն է ընդգծում, մարդկանց կյանքի և կենցաղի միապաղաղությունը:

² Ա. Բակունց, Երկեր, Երևան, 1986, էջ 135:

³ Նույն տեղում:

⁴ Նույն տեղում:

⁵ Նույն տեղում, էջ 136:

Երկրորդ խմբի աշակերտները գտնում են այն հատվածները, որոնք նկարագրում են նկարչին ու հնէագետին, նրանց գործողությունները: «Նկարչի ամբողջ հարստությունը ծոցի հաստ տետրն էր և սրածայր մատիտը: Հերիք էր աչքն ընկներ մի դեմքի, տեսներ գեղեցիկ մի անկյուն, մամռապատ մի քար, որպեսզի թղթի վրա մատիտով նկարեր այն, ինչ տեսել էին նրա աչքերը: Ֆետրե գլխարկով մարդը նկարեց պարիսպների փլվացքը, սրածայր բուրգը և պատերի հետքերը... Հնագետը չէր տեսնում ո՛չ մանուշակ, ո՛չ խոտ:

Նրա կոշիկները կրնկակոխ էին անում խոտ ու ծաղիկ: Աշխարհը նրա համար ընդարձակ թանգարան էր, ուր չկար ոչինչ կենդանի և ոչ մի բզեզ: Նա պոկոտում էր քարերին փաթաթված բաղեղը, փայտի ծայրով արմատախիլ անում քարի ճեղքում բուսած մանուշակը, ձեռքով քարը շոյում և սրբում գրերի հողը: Նկարիչը տետրի նոր էջի վրա նկարեց և պարսպի մի մասը, ատամնաձև քարերի արանքում, քարե արծվի բույնը, պարսպի ոտների տակ՝ ալպիական մանուշակներ»⁶:

Աշակերտները եզրակացնում են, որ հնէագետի տեսած գեղեցկությունը անկենդան է ու անշունչ, իսկ նկարչի տեսած գեղեցկությունը՝ կենդանի:

Երրորդ խումբը նկարագրում է չքնաղ անձանդուհուհու և գուգահեռ տանում ծովափի կնոջ հետ: Մանուշակագույն էին ծովափի կնոջ աչքերը, ծովն ասես ափ էր շպրտում ալպիական ծիրանագույն մանուշակներ, իսկ նկարչի քաղած և ծոցատետրի մեջ գետեղած մանուշակը և՛ կարոտ էր, և՛ խռովք, և՛ սփոփանք: Նկարիչը նկարում է գեղեցկուհուն, որը փաստորեն ակամայից է բնորդում: Այդ ամենը խանդ է առաջացնում նրա ամուսնու մեջ:

Ո՞րն է գեղջկուհու մեղքը: Հնձվորը սխալ է վարվում, երբ ծեծում է կնոջը: Աշակերտները տալիս են այդ հարցերի հիմնավոր պատասխանները՝ մեջբերումներ անելով բնագրից: Հնձվորը սխալ է վարվում, երբ ծեծում է կնոջը բայց հոգեբանորեն նրան էլ կարելի է հասկանալ. խանդոտ հնձվորը չէր կարող լուռ ու մունջ տանել իր օջախում իր բացակայությամբ անձանթ մարդկանց որոշ քայլերը՝ երեխային

⁶ Նույն տեղում:

արծաթե դրամ, կոնսերվի տուփեր տալը, մինչև անգամ կնոջը նկարելն ու նկարը ծոցը դնելը:

Աշակերտները եզրակացնում են՝ գրողը ստեղծում է երկրի բնության և դաժան կենցաղի պատկերը: Դաժան բնություն, դառը կյանք, անսահման խեղճություն, որ ծանրացնում է մարդկանց բախտը, աղավաղում գեղեցկությունը:

Չորրորդ խումբը բնագրից դուրս է գրում պատկերավորման միջոցները:

Տնային առաջադրանք: Հանձնարարում ենք պատմել պատմվածքի բովանդակությունը և նկարագարողել պատմվածքը:

Երկրորդ դասաժամը նվիրում ենք պատմվածքի կառուցվածքային վերլուծությանը, բացահայտում գաղափարը: Դասարանում վահանակին փակցնում ենք շնորհալի աշակերտների նկարագարողումները: Ապա աշակերտներին հրավիրում ենք ակտիվ գրույցի՝ պատմվածքի ժանրային առանձնահատկությունների, վերնագրի և «Ալպիական մանուշակ» խորհրդանիշի շուրջ: Աշակերտները պատասխանում են այս հարցին. «Գրականության մեջ «Ալպիական մանուշակը» ընդունվում է և՛ որպես պատմվածք, և՛ որպես նովել: Ձեր կարծիքով ի՞նչ է այն»: Աշակերտները հանգում են հետևյալին. այս ստեղծագործության մեջ նկարագրությունները, խորհրդածություններն ավելի շատ են, քան գործողությունները: Շատ են նաև քնարական շեղումները, երկն ունի սրընթաց ավարտ: Այն, ուրեմն, քնարաշունչ նովել է:

3. «Ալպիական մանուշակը» պատմվածքի քնարականությունը

Ինչպե՞ս է գրողը նկարագրում աշխարհը, Կաքավաբերդը, ալպիական գեղեցկությունները: «Կաքավաբերդի գլխին տարին բոլոր ամպ է նստում»- այսպես է սկսվում նովելը, և բացվում է մի ինքնատիպ աշխարհ: Հետևում է խստաշունչ բնության էպիկական պատկերը: Այս բնությունը քնքշացնում է միայն մի ծաղիկ՝ ալպիական մանուշակը՝ «ցողունը կաքավի ոտքի պես կարմիր, ծաղիկը ծիրանի

գույն»⁷: Խստաշունչ նկարագիրը հիշեցնում է նաև կյանքը: Կաքավաբերդի անկրկնելի պատկերը ընթերցողին տանում է դեպի մարդկանց աշխարհը: Ովքե՞ր են ապրում այդ բնության մեջ, նման չե՞ն արդյոք նրանք ալպիական մանուշակի ծաղկափոշու մեջ թաթախված բզեզին, որին մանուշակը ճոճք է թվում, աշխարհը՝ ծիրանագույն բուրաստան:

Բակունցը պատկերում է մարդկանց մուտքը դեպի այդ անառիկ սարերը: Եկվորներից մեկը ներքև է նայում, մյուսը՝ վերև, մեկը գերեզմանաքարերին է նայում, փնտրում ինչ-որ կորցրած բան, մյուսը որոնում է գեղեցկություն: Սրանց ավելանում է հնձվորը. առաջինները եկել են ինչ-որ բան որոնելու այս աշխարհում, իսկ հնձվորը յուրովի մտածում է, թե ովքեր են և ինչ են որոնում ավերակներում. «Ի՛նչ կլինե՞ր, եթե ինքը գտներ գանձը: Քանի անգամ է նա նստել հենց այն քարի վրա, որ տեղահան արեց ակնոցավորը: Եթե իմանար, ապա գանձերը կլինեին նրա արխալուղի գրպանում: Քանի՛ կով կառներ...»⁸: Ստեղծվում են երեք բնավորություն, ընթերցողը մղվում է դրամատիկ ապրումների ոլորտը: Երևան է գալիս ամենաուժեղը՝ կնոջ կերպարը: Հեռավոր Կաքավաբերդում, կարիքի ու խավարի մեջ, աշխարհից կտրված սարերի վրա ապրում է մի հրաշք գեղեցկություն, ալպիական մանուշակի նման գեղեցիկ մի կին: Գեղեցկություն որոնողը շտապ նկարում է կնոջը: Նա զարմանալի նման է մի ուրիշ կնոջ: Որտե՞ղ է տեսել, հնարավոր է այդքան նմանություն... Նույնքան բարակ մեջքով, նույնպիսի աչքերով, բարձրահասակ: Նա տեսել է նման մի կնոջ հեռվում, ծովափին. «Այն կինը երբեք բոբիկ ոտքերով չի՛ քայլել, չի՛ նստել միացող աթարի առաջ»⁹: Եվ ահա հեռավոր նահապետական գյուղում՝ վրանի տակ՝ խավարի մեջ, բոբիկ ոտքերով մի կին փչում է ծխացող կրակը... Նա զարմանալի նման է ծովափի կնոջը, բայց որքան տարբեր է նրանց կենցաղը, ճակատագիրը, շրջապատող մթնոլորտը: Մեկը նստած է օջախի առաջ, խառնում է կրակը, աթարներն իրար քաշում, ծխի մեջ թվում է մի քրմուհի՝ եռոտանու առաջ ծխի

⁷ Նույն տեղում, էջ 135:

⁸ Նույն տեղում, էջ 138:

⁹ Նույն տեղում, էջ 140:

շարժումները գուշակող: Մյուսը ազատության մեջ էր, հեռավոր ծովափին: Նկարիչը թղթին է հանձնում կնոջ պատկերը: Միայն մի պահ այդ գեղեցիկ կինը, որին գուցե այլ պարագայում բախտը ժպտար, մտնում է կյանքի շրջանը: Միայն մի անգամ նա զգում է ուրիշ աշխարհի շունչ:

Ինչպե՞ս է վերջանում պատկերը: Մարդիկ թեյ են խմում և գնում, բայց դրաման շարունակվում է... Օտարականները գալիս են ու գնում, իսկ գյուղի մարդիկ կրկին մտնում են մոայլ տարերքի մեջ: Հնձվորը վերադառնում է աշխատանքից դառնացած և հոգնած: Մոայլ տրամադրությունից և հոգնությունից նա կատաղում է: Այս բոլորին ավելանում է երեխայի միամիտ ակնարկը:

Բակունցը շատ ուժեղ է նկարագրում վայրենի խանդի բռնկումը: «Խանդը կայծակի պես փայլատակեց մոայլ հնձվորի սրտում: Աչքերը լայնացան, նա գունատվեց: Մայրը նայեց տղային, հրդեհվեց դեմքը: Հայրը տեսավ կնոջ դեմքի կարմիրը: Այդ ամենը կատարվեց մեկ վայրկյանում: Հաջորդ վայրկյանին մարդը գազազած արջի նման ուսոյուն արեց, նրա մագոտ ձեռքերը սեղմեցին ծանր մահակը, և մահակը անասելի թափով իջավ կնոջ թիկուքին: Սուրմանները զրնգացին, ցնցվեցին կնոջ երկար ծամերը: Մահակի ջարդված ծայրը թռավ ծալքի վրա: Կինը աղաղակ չհանեց, այլ ցավից գալարվեց: Նա ձեռքը թիկունքին տարավ, ապա դուրս եկավ վրանի դռանը անձայն հեկեկալու...»:¹⁰ Ահա այսպես, այս թշվառ անկյունը մի պահ կապվում է մեծ աշխարհի հետ և նորից խխունջի պես ետ քաշվում իր պատյանը. «Հետո Կաքավաբերդի գլխին լռություն իջավ: Օջախներում հանգավ կրակը: Եղավ խավար գիշեր: Գազանների ահից շները կուչ եկան վրանների առաջ: Ոչխարը պառկեց կանաչի վրա: Խսիրի վրա մեկնվեց և կինը, թաղիքի տակ ծածկելով տղային»¹¹:

Այս նովելում Բակունցը նուրբ խոսք է ասում իր արվեստի կենսունակության մասին. «Ուզում եմ, որ այս անգարդ տողերը մնան այնքան, որքան կմնա մեր

¹⁰ Նույն տեղում, էջ 143:

¹¹ Նույն տեղում:

քարափը»¹²: Նա իրոք հյուսում է անգարդ, խորունկ, բնական տողեր՝ մարդու բախտի, աշխարհի և մեծ բնության մասին: Վերջին պատկերն էլ միանում է կենսափիլիսոփայությանը. «Կաքավաբերդի գլխից ամպը հսկա խխունջի պես սողաց դեպի վրանները, խոնավություն կաթեց քարերի վրա, մամուռների վրա, և մակադած ոչխարների բրդի վրա նստեց գիշերային խոնավությունը: Ցող կաթեց ալպիական մանուշակի ծաղկաթերթի վրա: Բուրմունքից արբեցած մի բզեզ քնել էր առեջքների մեջ, և նրան այնպես էր թվում, թե աշխարհը հոտավետ բուրաստան է, ալպիական մանուշակ»¹³:

ԵԶՐԱԿԱՑՈՒԹՅՈՒՆՆԵՐ

1. Հանրակրթական դպրոցում գեղագիտական դաստիարակության հիմնական նպատակը համակողմանի և ներդաշնակ զարգացած անձնավորության դաստիարակությունն է, որը մեծապես նպաստում է նոր սերնդի՝ գեղեցիկի նկատմամբ զգացողության առաջ բերելուն, սովորեցնում է տեսնել, հասկանալ ու գնահատել գեղեցիկը և վսեմը թե՛ բնության մեջ, թե՛ կյանքում և թե՛ արվեստի բնագավառում: Այդ ամենը մարդու մեջ հակում է առաջ բերում իր կյանքի ընթացքում մշտապես հետաքրքրվելու արվեստի նորանոր արժեքներով և հասնելու գեղեցիկի ավելի նուրբ ու խոր զգացողության ու լիակատար ըմբռնման:
2. «Ալպիական մանուշակը» պատմվածքը ուսուցանելիս, դասը ամբողջությամբ ծառայեցնում ենք աշակերտների հոգեկան աշխարհը, զգացմունքները հարստացնելու և կրթելու, նրանց գեղեցիկ խոհերով համակելու նպատակին: Դրանով, միևնույն ժամանակ, խորացնում ենք սաների գիտելիքները՝ Բակունցի գեղագիտական հայացքների, մարդկային հոգու գեղեցկությունների հայտնաբերման, կյանքը հոգեբանական հայացքով դիտելու կարողության և

¹² Ա. Բակունց, Երկերի ժողովածու, հ. 1-ին, 1976, էջ 248:

¹³ Ա. Բակունց, Երկեր, Երևան, 1986, էջ 143:

լիբիզմի վերաբերյալ, զարգացնում ու կատարելագործում ենք նրանց լեզվական կուլտուրան, ճաշակը:

3. Պատմվածքի ուսուցման ընթացքում ծավալած աշխատանքի շնորհիվ աշակերտների համախմբված և անհատական պրպտումները, ապրումակցելը, զանազան մեթոդների կիրառությունը ի հայտ բերեցին սովորողների իրական հնարավորությունները, հետաքրքրությունների շրջանակը, թե ինչպես է յուրաքանչյուրը կարողանում զգալ ստեղծագործությունը: Առաջադրված հստակ պահանջների, հարցերի ու խնդիրների կատարման հետևանքով հաջողվել է հասնել դրված նպատակին:
4. Տեխնիկական միջոցների կիրառումը ևս մեծապես նպաստեց աշակերտների կողմից ստեղծագործության զգայական-գեղագիտական ընկալմանը:
5. Տեքստային աշխատանքի ժամանակ անձանոթ բառերի բացատրությունը գտնելը, գեղարվեստական երանգ ունեցող բառերի ու արտահայտությունների առանձնացումը, սովորողների ինքնուրույն որոնողական աշխատանքը նպաստեցին նրանց բառապաշարի զարգացմանը, որը նաև հիմք կդառնա կապակցված խոսքի ձևավորմանը:

Գրականության ցանկ

1. Ս.Աղաբաբյան, Ակսել Բակունց, Երևան, 1963:
2. Ա. Բակունց, Երկեր, Երևան, 1986:
3. Ա. Բակունց, Երկերի ժողովածու, հ. 1-ին, 1976:
4. Դ. Գասպարյան, Ակսել Բակունց, Կյանքը և ստեղծագործությունը, Երևան, 2009:
5. Հր. Թամրազյան, Սովետահայ գրականության պատմություն, Երևան, 1984:
6. Ռ. Իշխանյան, Ակսել Բակունցի կյանքն ու արվեստը, Երևան, 1974